

八世祖威武將軍團公實錄

八世祖諱團宋開州刺史大夫諱兢之子也太宗朝歷官參將
領兵勤王以功封威武將軍加侯職晉封信國公食邑三千戶
卒于京享壽八十二歲勅葬紫金山有軍人守墓謚英烈公配
夫人九元氏王次劉周程常楊黃毛鮑生子十一球明洪清恭
茂槐慶宗壽秀惟秀生最晚義門莊業時已分定諸兄集議於
福壽寺各退莊田一分歛攏成莊給秀管理遂改福壽寺爲歛
田寺先是鮑夫人隨公留京公卒後塑公像與秀奉回入歛田
寺享祀名曰歛田神後因世亂移入都天神案至今香火弗替

云

論曰公承忠厚之遺爲朝廷倚重當時勲業必有厯厯可觀者
乃生徒著其名沒難詳其實數典者不能無遺恨矣然至今數
百餘載而窮鄉僻壤婦孺知名以視彪炳史冊者何如也又況
廟享千秋祀隆萬姓所謂盛德之後必百世祀者公其庶幾矣